



23. januar 2023

UPA 2023/164

Inatsisartut Suleriaasianni § 36 naapertorlugu apeqquteqaat aallaavigalugu siunnersuut imattoq matumuuna saqqummiuppara:

Ilumut Danmarkimiit avissaarniarneq inuup inuuneraniit naleqarnerusutut isigineqassanersoq apeqquteqaat aallaavigalugu oqallisissiaq.

(Inatsisartuni ilaasortaq Aqqalu C. Jerimiassen, Atassut)

Inuk kinaluunnit peroriartorluni nammineerumalluni angajoqqaaminiit avissaarusulertarpoq. Inuunerup ilagiinnarpaa. Inuaat kikkulluunniit nammineerusussuseqarlutik nunamik allamik isumalluuteqarneq qimakkusulertarpaat.

Allaammi oqartoqartalersimavoq qanorluunniit akeqaraluallarp, qanorluunniit naleqaraluallarp massakkorpiaq Naalagaaffinngortariaqartugut. Allaat oqartussaaffit suli tigusimanngisagut imminiik, ilai oqarput. Allaallu inuup inuuneranik naleqaraluarp ilumut taamaaliorniarpugut? Ajoraluartumimmi inuit peqqinnissaqarfitsinniit ikiorserneqarsinnaagaluarlutik toquinnartarput. Nammineerusunneq paasinaraaluartoq inuup inuuneranik naleqassappat, ernumanarluinnartumik ingerlalertornissarput oqallisigineqarnissaa kissaatigalugu taamatut ammasumik saqqummiivugut.

Uanili apeqqut pingaarutilik tassaavoq, inuup inuunera qanoq isumaqarpa? Inuup atugai qanoq naleqartinneqarpat? Nuna nammineertoq oqariartutigineqarturopoq, taamaattorli inuk nammineertoq uagutsinniit pingaartillugu eqqaalaarusupparput.

Takorluulaartigumi inuit tamavitta isumaqtigilliuta, partiit tamavitta isumaqtigikkutta, qaa massakkut Naalagaaffinngorniarta. Taava imaassanerpa tassa piareertugut? Akerliusqarunnaaruni aningasaqarnikkut immitsinnut napatisinnaalersimassaagut? Inuittaaq tamatta sullarilluta pisortaniit isumalluuteqarunnaariaasaassaagut?

Atassummiit apeqqutaatippallaanngilarput Naalagaaffiunersugut immaqaluunniit Naalagaaffinngorusunnersugut. Pingaartilluinnarparpummi innuttaasut atugaasa saliunneqartuarnissaat. Aatsaat tusalerunangilarsi oqarluartaaruterput Inuk Qitiutillugu. Innuttaasummi tassaapput nammineernerulernissamik pilersitsisussat. Uagullu politikkerit tassaavugut killilersuinata inuit kiffaanngissusaannik pilersitsisussat.

Nunami innuttaasoqanngippat pinngortitaannaavoq kusanartorsuaq.

Ilaasa siunertaq kusanartoq angorusullugu eqqartoraat, ilaasalu QANOQ taanna angussanerlugu eqqartoraat. Paasinarpooq akerleriippaluttumik oqallinneq ingerlasarmat. Allaallu inuiaqtigiiit avissaartuuttutut isikkoqarluta.

Tamattami inuit uniaaluunnginnatta, tamallu oqartussaaqataanerat tunngavigalugu ingerlajumagatta qaqugukkulluunniit isumaqtigiiituannarsinnaanngilagut. Sapinngisamilli isumaqtigigiissutigisigu



suna eqqartornerlugu. Naalagaaffinngorusunneq aappimik naamimilluunniit tunngavilik eqqartarpapput? Immaqaluunniit QANOQ taanna anguniarneqarnersoq eqqartarpapput? Ilaasa Naalagaaffinngornissaq eqqartorumagaat ilaasalu innuttaasut atugaat eqqartorumagaat.

”Inuuusuttorsuuvusi saperasi isumaqaleritsi” oqartoqarpoq. Aap piumassuseq nukiuvoq. Naalagaaffinngornissamullu piumassuseq nukiusimappat ukiut 40-t sinnerlugit amerlanerussuteqangaartut piumagaluartut soormi taava suli Naalagaaffinngunngilagut?

Inuit politikkerinik Naalagaaffimmik pilersitserusuttunik qinersisarput, ukiorparujussuarni, qularnanngilarlu aamma qinersinerup tullissaani aamma taamatut. Soormiuna taava suli taasitsisoqanngila? Aqagu taasitsisoqarpat nalugunannigilarsi uagut qanoq taassisansersugut.

Allammi pisuuteqattaaginnarsinnaanngilagut, immitsinnut qiviartariaqarpugut, nassuerutigisariaqarpagullu nammineerluta suut pikkorluffiginerigut. Nammineerlatalu akisussaaffik tigusinnaalersimagutsigu angusaqarluarnissarput qularnanngilaq. Naalagaaffimmuna nammineerluta pilersitassarput. Arlaata qulaaniit tunniunnavianngilaa, pisuutitsiuarnikkullu pilersitassaanani.

Utoqqatserfigineqalersimavugut, piffissanngorsoraarpullu massakkumiit nammineq akisussaaffeqalernissarput, pisortanik isumalluuteqarunnaarnissaq, oqallinnerlu Naalagaaffinngornissamut akuersartaunuermiit akerliunermiillu apeqqut uteqattaarunaarlugu, QANOQ ingerlariaqqinnissaq ukkatarilernissaa oqallisigitigu.

Siunertamik suaaruteqartarneq killiffigiinnarnagu, nammineq akisussaassuseqarneq, nassueruteqarsinnaassuseq, pisuutitsiuunnaarluta, immitsinnut nalligiinnarunnaarluta aqqutissagut iliuusissagullu eqqartortigut.

Qitornagut kissumiaannarunnaarlugit inuttut nammineersinnaassuseqarmata tatigitigut.